



KENYATAAN MEDIA
MENTERI SUMBER ASLI DAN ALAM SEKITAR
KEMENTERIAN SUMBER ASLI DAN ALAM SEKITAR (NRE)

DIKELUARKAN PADA: 10 OKTOBER 2015 (SABTU)

STATUS KUALITI UDARA

Pada 10 Oktober 2015 (Sabtu), bacaan Indeks Pencemar Udara (IPU) yang direkodkan pada jam **9.00 pagi** menunjukkan 14 kawasan mencatatkan status kualiti udara pada tahap baik, 37 kawasan mencatatkan status kualiti udara pada tahap sederhana, dan **tiada kawasan mencatatkan status kualiti udara pada tahap ‘tidak sihat’.**

Bacaan IPU terkini setiap jam boleh dirujuk di laman web Jabatan Alam Sekitar (JAS) di alamat url, <http://apims.doe.gov.my/v2/> atau dengan memuat turun aplikasi telefon pintar rasmi MyIPU di ‘Google Play’ atau ‘App Store’.

Kawasan di serantau negara sedang menerima tiupan angin yang lemah dan dari pelbagai hala. Keadaan ini telah menyebabkan kawasan serantau negara kita mengalami cuaca yang agak lembap. Dengan keadaan seperti ini, hujan di satu dua tempat boleh berlaku di negeri-negeri di Pantai Barat Semenanjung pada awal pagi. Manakala pada waktu petangnya pula, hujan dan ribut petir di satu dua tempat boleh berlaku di semua negeri di Semenanjung dan semua bahagian di Sarawak serta Bahagian Barat Sabah.

BILANGAN TITIK PANAS (HOTSPOT)

Berdasarkan laporan oleh *ASEAN Specialised Meteorological Centre (ASMC)* yang berpusat di Singapura pada 9 Oktober 2015, imej satelit *National Oceanic and Atmospheric Administration (NOAA) 18* mengesan sebanyak 217 titik panas (hotspot) di Kalimantan, Indonesia dan sebanyak 1 titik panas (hotspot) dikesan di Sumatera, Indonesia. Walau bagaimanapun, bilangan sebenar titik panas (hotspot) di Sumatera tidak dapat dikesan kerana cerapan satelit tidak menyeluruh dan faktor litupan awan. Sementara itu, satu titik panas (hotspot) dikesan dalam negara iaitu di negeri Sarawak.

Peta Jerebu Serantau yang dikeluarkan oleh *ASMC* pada 9 Oktober 2015 adalah seperti di **Rajah 1**. Berdasarkan peta tersebut, kawasan-kawasan di Sumatera dan Kalimantan, Indonesia masih diselaputi asap jerebu tebal dan sederhana dengan corak tiupan angin dari pelbagai arah.

TINDAKAN-TINDAKAN DI PERINGKAT TEMPATAN

Jabatan Alam Sekitar (JAS), NRE berterusan memantau rapi bacaan IPU di seluruh negara melalui 52 stesen pengawasan kualiti udaranya. Mekanisme tindak balas (*response mechanism*) semasa berlakunya jerebu adalah mengikut **Pelan Tindakan Jerebu Kebangsaan** di mana tindakan-tindakan telah diambil oleh agensi yang terlibat adalah seperti berikut:-

- (i) Mesyuarat Jawatankuasa Jerebu telah diadakan dan dipengerusikan oleh YB Menteri Sumber Asli dan Alam Sekitar (NRE) pada 28 Ogos 2015, 18 September 2015 dan 6 Oktober 2015. Ia bertujuan memantau perkembangan terkini keadaan jerebu dan menyelaras tindakan-tindakan antara agensi berhubung pengurusan bencana jerebu;
- (ii) Kementerian Pendidikan Malaysia (KPM) telah mengumumkan penutupan semua sekolah di seluruh Malaysia kecuali di Kelantan, Sabah, Sarawak dan Labuan pada 5 dan 6 Oktober 2015 berikutan bacaan IPU yang telah mencecah melebihi 200 pada 4 Oktober 2015. Semua sekolah di Pulau Langkawi, Kedah masih ditutup pada 7 Oktober 2015;

- (iii) Majlis Keselamatan Negara (MKN) telah menggerakkan Jawatankuasa Pengurusan dan Bantuan Bencana Pusat (JPBBP) mengenai pengendalian bencana jerebu pada 30 September 2015;
- (iv) Kementerian Pendidikan Malaysia (KPM) telah mengumumkan penutupan semua sekolah di WP Putrajaya, WP Kuala Lumpur, Selangor, Negeri Sembilan dan Melaka pada 28 September 2015 berikutan bacaan IPU yang telah mencecah melebihi 200 pada 27 September 2015. KPM telah mengumumkan bahawa semua sekolah di Melaka dan Johor ditutup pada 29 September 2015, manakala penutupan semua sekolah di Johor dilanjutkan sehingga 30 September 2015;
- (v) Kementerian Pendidikan Malaysia (KPM) telah mengumumkan penutupan semua sekolah di Bahagian Kuching, Bahagian Sri Aman dan Bahagian Samarahan, Sarawak pada 28 September 2015 berikutan bacaan IPU yang telah mencecah melebihi 200 pada 27 September 2015;
- (vi) Ketua Pengarah Alam Sekitar telah mengeluarkan Perintah Larangan Pembakaran Terbuka (PLPT) bagi seluruh negeri Johor pada 25 September 2015. Sementara itu, PLPT bagi negeri Selangor, Melaka, Negeri Sembilan, Wilayah Persekutuan Kuala Lumpur dan Putrajaya yang dikeluarkan semenjak bulan Mac 2014 sehingga kini masih berkuatkuasa. Melalui larangan pembakaran terbuka ini, semua aktiviti pembakaran terbuka di kawasan-kawasan yang berkenaan adalah dilarang sama sekali kecuali aktiviti tertentu iaitu pembakaran mayat, pembakaran bagi tujuan keagamaan, grill/barbeku dan pembakaran gas mudah terbakar (flaring); dan
- (vii) Jabatan Meteorologi Malaysia (MET Malaysia) dan Tentera Udara DiRaja Malaysia (TUDM) telah menjalankan operasi pembenihan awan dari 15 September 2015 hingga 5 Oktober 2015 sebagai tindakan untuk mengurangkan kesan jerebu. Sebanyak lima (5) operasi telah dijalankan di Semenanjung Malaysia dan sebanyak tiga (3) operasi telah dijalankan di negeri Sarawak.

TINDAKAN PERINGKAT SERANTAU

YAB Perdana Menteri telah mengutus surat kepada Presiden Indonesia bertarikh 6 Oktober 2015 bagi menyuarakan kebimbangan Malaysia mengenai situasi jerebu dan YAB Perdana Menteri juga telah menggesa agar tindakan pemadaman diperhebat supaya masalah jerebu ini dapat dihentikan segera.

TINDAKAN PENGUATKUASAAN KE ATAS AKTIVITI PEMBAKARAN TERBUKA

Berdasarkan siasatan oleh Jabatan Alam Sekitar (JAS) pada tahun ini sehingga 07 Oktober 2015, sebanyak 3,478 kes pembakaran terbuka telah dikesan di seluruh negara iaitu pembakaran terbuka melibatkan kawasan hutan (593 kes), kawasan pertanian (1194 kes), kawasan industri (19 kes), kawasan pembinaan (73 kes), tapak pelupusan sampah (96 kes), kawasan belukar (688 kes) dan lain-lain pembakaran terbuka kecil (815). Bagi tempoh yang sama, sebanyak 216 kes pembakaran terbuka telah dikenakan tindakan kompaun dan 15 kes telah dikeluarkan Notis Arahan dan 41 kes telah dikeluarkan Surat Arahan. Selain itu, sebanyak 23 kes pembakaran terbuka telah disediakan kertas siasatan untuk diambil tindakan mahkamah.

NASIHAT KEPADA ORANG AWAM

Semua pihak dinasihatkan agar tidak melakukan pembakaran terbuka atau membiarkan tanah atau premis kepunyaan mereka dimasuki atau dicerobohi oleh pihak-pihak yang tidak bertanggungjawab sehingga menyebabkan pembakaran terbuka untuk tujuan tertentu atau dengan tidak sengaja.

Orang ramai juga diminta bekerjasama untuk memadam kebakaran-kebakaran kecil dan juga melaporkan kes-kes pembakaran terbuka atau kebakaran kepada Jabatan Perkhidmatan Bomba dan Penyelamat di talian **999** dan Jabatan Alam Sekitar (JAS) di talian bebas tol, **1-800-88-2727**.


Semasa keadaan berjerebu, orang ramai dinasihatkan untuk mengambil langkah berjaga-jaga dengan mengelakkan dari berada di luar rumah, mengurangkan aktiviti riadah luar dan sekiranya perlu berada di luar hendaklah memakai penutup hidung dan mulut (mask) serta mendapatkan nasihat kesihatan dengan melayari laman web Kementerian Kesihatan Malaysia (KKM) di alamat <http://www.infosihat.gov.my>.

KEMENTERIAN SUMBER ASLI DAN ALAM SEKITAR

10 Oktober 2015

PETA JEREBU SERANTAU, 9 OKTOBER 2015

(Sumber : ASEAN Specialised Meteorological Centre, Singapura)



Regional Haze Update

The low hotspot count in Sumatra was due to partial satellite pass and cloud cover. Moderate to dense smoke haze was observed in central and southern Sumatra. Kalimantan continued to be shrouded in widespread smoke haze.

Updated 7:09 PM 9 Oct